


夢界遺文

三

特 258

192



始



持257
190

夢界遺文卷三

東京 關口隆正著

文靖先生行狀

先師文靖先生諱辰字君盈號甕谷通稱辰吾後改
伊助姓岡松氏世居豐後高田高祖諱勝稱數右衛
門靈感公擢爲高田鄉長其弟某亦以醫事國列于
士籍靈感公爲熊本藩中興名君高田卽藩屬邑而
隸于鶴崎子孫世襲其職與其稱考諱眞友妣奈須
氏生三男一女長曰眞任字子棟稱俊助次卽先師
也女夭季曰魯字鍊甫稱魯助先師以文政三年庚

辰正月十四日生于高田。有老婢。自幼事岡松氏。忠實無比。尤愛撫先師。日夜追隨嬉戲。或秣於木馬。或指示圖冊。常語先師曰。成長之後。必爲名士矣。婢死。先師年甫六歲。哀之如成人。旣從鄉先生。初受句讀。叔父信甫君與高山仲繩友善。每談其逸事。於是先師夙明王霸之辨。比及成童。欲入國學。往游熊本。不被容。憤然而去。會日出藩儒帆足文簡先生以病致仕。垂帷授徒。稱其讀書處曰西嶮精舍。先師乃往。策名門下。時年十六。明年三月。眞友君轉佐賀關鄉長。先師移于西嶮。致力學業。夜以繼日。矻矻匪懈。凌駕

同儕。是歲文簡先生所著窮理通八卷脫稿。先師與野本伯美米良子庾諸先輩。校訂繕寫。先生又撰井樓纂聞。命先師等以漢文譯之。而先師行文。往往極妙。師友皆稱其所造詣不可測云。天保九年戊戌。夏。外舅棧園翁罹疾。舉家伏枕。報至。奈須氏大憂曰。阿兄一家罹是災厄。妾安得不親省。眞友君恐其或傳染也。固止之。遣先師先往候之。旣歸。具報其狀。奈須氏卽往。留旬餘日而還。適值幕府巡檢使來館。佐賀關官舍。因僦居於所識商家。奈須氏已感疫。力疾經理搬運等事。一夕上吐下瀉。暴卒。實四月二十日也。

先師兄弟慟哭。奉柩歸葬高田。頃之真友君亦寢疾。歷夏涉冬。有加無損。遂以十二月十日歿。先師一歲而再遇大戚。號哭天地。絕而復蘇。真任君嗣家襲職。魯君年甫十一。兄弟荐喪。怙恃。遭家多難。先師獨以文簡先生爲依歸焉。先生亦酷憐愛之。先師益勤學業。居七年。先生遊于椎谷。先師從之。文以記其行。詩以咏其景。先生稱之。時年二十六。會木下士勤扈從藩公過鶴崎。乃往見之。士勤稱其學問文章。遂締忘年交。士勤犀潭先生之字。長先師十五歲。弘化四年丁未春。真任君轉佐賀關鄉長。四月。文簡先生將遊

京師。先師與野野瀨日野後藤加藤諸氏從之。加藤越中人。業成。將歸其國也。先師與加藤先發。迎先生于佐賀關。航海抵伊豫。過讚岐阿波。又航抵和泉。淹留浪華。五月入京師。先生寓東福寺中。先師乃在靈山宗氏別莊。宗氏名信哉。字士仁。亦同門之友。以任俠聞。最與先師親善。先師時訪儒流。或逍遙山紫水明之間。優游自適。數閱月矣。初先師之在西嶮也。諸生視其學業絕群。先生鍾愛之狀。竊嫌忌之。先生將出遊。特召先師戒之。先師感激。奉侍愈謹。長驛短亭。攀山涉水。致心竭力。無所不至矣。至是忽有構讒者。

曰。辰吾舉止不慎。恐累之及先生也。先師以爲不若高舉遠引。乃以十二月去。遊江戶。行李蕭索。備嘗艱難。先師夙奉師訓。其講經義。不襲於洛閩。務涉獵於群籍。文章以記實爲要。又唱西洋窮理之說。當是時。江戶儒生。大抵皆尊崇程朱。至西洋史籍。則素不通曉。其通者。獨有蘭方醫焉耳。甚則呼曰夷狄之徒。先師初見安井仲平於薩邸文社。交情漸密。又再遇士勤。外此無復知先師者。貧困交迫。遂依竹內玄洞。玄洞卽蘭方醫也。見先師稍通醫籍。大喜。延爲賓客。頗優待之。諸生不悅。以先師貧乏故。設宴侮辱之。先師

適聞舊友官於延岡邸。乃往借小方金一片。遵照塾規。購蕎麥與酒報之。戲留一書曰。蕎麥與側。國訓相通。酒與避通。僕當避諸君側也。遂去。嘉永元年戊申三月。觀櫻于墨田川。又詣赤穗義人墓于泉岳寺。作記遣懷。大番頭久貝因幡守居于市谷柳街。因號柳厓。愛文武之士。因修理其邸西北隅一舍。以聘先師。先師取於東坡詩句。題曰東雪舍。是歲米利堅軍艦來浦賀。上下騷擾。天下漸將多事。日出城主木下氏強起文簡先生。參預政務。先生寄書信哉。召還先師。先師呈書固辭。弗聽。明年春。入京師。主信哉家。觀櫻

嵐山。與俳人梅室等遊。四月。歸鄉。既至西崦。監督群弟子之業。又授童子句讀。七月。起承久記略稿。數月卒業。蓋想叔父之談。而有所觀感於當世也。時年三十。先師屢請讀荷蘭書。先生輒笑曰。汝且涵泳詩書。流連今古。年四十。方肆力於西學可也。四年辛亥秋。文簡先生罹疾。先師日夜侍湯藥。衣不解帶。至冬瘡。自西崦徙日出。先師與諸生十餘人留守焉。歲除。甕中止有斗米。而鹽豉薪樵。纔得過歲。會大神村正贈野蔬數種。先師更餽午房於賀來士。愛乞易酒。士愛報以酒一瓶。副魚肉一載。先師大喜。誦東坡在儋耳

詩和之。明年二月。請閒遊熊本。魯君居焉。五月。歸舍。聞先生疾病。將往見之。日出藩法。嚴禁他國人士。出入城中。六月十四日。先生遂歿。先師以不得相見。哀痛不能自禁。會葬康德之山。執喪講禮。每遇其忌。與群弟子會於墓下。守夜以倣古者廬塚之意。八月。歸高田。十一月。補國學生員。欲辭不就。而有司督催上途。遂抵熊本。諸生與居者二十餘人。學業皆遠不及先師。而饗殮菲薄。先師怏怏不樂。以待時之至。先是海防之論大噪天下。幕府令熊本藩出兵備邊。四方傳稱其適軍機。至是先師上書當路。凡數千言。議論

卓拔。文章敘暢。先達之士。或知非尋常書生之所企及也。遂辱澤村西坡先生之下交。先師亦能師事之。安政元年甲寅。轉爲經筵講讀。後以精通唐宋明清歷代律例。更轉獄曹椽。尋遷詮曹。列中小姓班。三年丙辰正月。請暇展父母墓。二月。從駕而東。取途山陽。三月。抵江戶。有羈窓漫興之著。校刻帆足文集。公行諸世。九月。將刻窮理通。會奧子紹以修造宇佐大廟之事。有請於幕府。久留江戶。子紹名並繼。同門之士也。因與謀議。僅得就功。以資用不贍。半途而廢。四年丁巳四月。西歸。娶北野氏諱恒子。考諱直春。稱隆右。

衛門。爲熊本藩司計吏。妣高橋氏。高橋氏姊妹卽士勤妻也。自時厥後。天下多事。諸侯朝覲。旁午于道。先師扈從藩公及世子。東往西歸。概無虛歲。羽倉簡堂河田猶興。長戶士謙。關思恭。及河越保岡。孚土佐松岡敏諸儒。當時之交遊也。成山公子至。自喜連川。召見先師。賜以茶菓。且命講經。成山公子卽今長岡子。文久二年壬戌。諸國勤王論起矣。成山公子如京師。是歲先師初買宅于壺井川上。題曰竹寒沙碧書莊。自公退食。暇輒讀書窮理。孜孜不息。坐觀天下形勢。五年于茲。一旦恍然念文簡先生之遺誨。遽病。請解

其職。取荷蘭書。伏而讀之。稍通其義。頗有論著。或笑曰。方今英吉利佛郎獨逸之書。入于吾邦。講西學者。皆宗之。荷蘭之書。所謂芻狗已陳者耳。先師憮然。遂不復修。上書成山公子。其略云。蓋自臣任職。於今十有三年。犬馬之齡。四十而加八。臣不幸荐罹西河之悼。常切北邙之痛。今也筋力竭盡。自請告以來。困頓偃牀。衰羸日加。自度已成廢棄。不勝灌濯以復薦於下僚也。伏惟閣下明睿所照。不遺乎覆盆之下。幸察螻蟻之微誠。爲言之公上。特賜骸骨。放歸田里。使得優游卒歲。天復假以數年。冀藉桑榆之餘景。復發舊

篋。取臣師緒言。伏而讀之。得成疇昔之志。臣雖死。猶愈於生遠甚矣。抑臣得以身退。伏匿草莽。臣子之分。豈敢忽然。一日忘在三之義哉。今後果能成其志。有少裨政化。此亦所以報於國。詎必日逐隊馳。驚於匆劇之場。而後爲能盡其職也。書既上。未數月。德川將軍納旌鉞。天子親政。於是乎。世勢一變。明治中興。鴻業成矣。元年戊辰春。先師奉使京師。米澤雲井龍雄。飫肥甲田某。携其師仲平書來見。當是時。奧羽各藩。連衡以抗王師。人人迷其嚮背。先師諭二生以大義所在。既而西歸。七月。復從小笠原大監航海到長崎。

初見西人布兒鼈吉。舉文簡先生嘗所論究者。質其疑義。布兒不能答。約再會而去。二年己巳四月。徵各藩儒員。先師亦應徵。擢昌平學校教授。已遷大學少博士。時年五十。芳野金陵賴支峰重野成齋川田甕江藤野海南。皆其同僚也。遠近志士聞先師之名。來問業者。大聖寺藩倉知光謙等三十餘人。一夜雲井龍雄來訪。慷慨悲憤。先師酌酒慰諭。臨去。察其窮。傾囊與三十金。後屢乘昏而來。夜半而去。先師與仲平甚愛其才。將有所計。未幾。處斬。明年庚午五月。眞任君歿。先師請暇歸鄉。孤子益夫尙幼。乃使魯君承其

後。七月。罷少博士。更補太政官權少史。固辭不就。布兒鼈吉時在開成學校。屢往訪之。後使井上多久摩詳譯磁石指北及潮汐之理示之。布兒嘆曰。西人尙未窮此理。而東儒既有窮之者乎。吾恨不得見帆足先生耳。多久摩故井上文部大臣之幼名也。是時素與先師相親善者。爭薦之朝。先師曰。吾寧歸隱故山耳。盡謝從游之士。遂拂衣而去。獨有秋山範誠。土浦人也。固請而從焉。既歸。爲弟魯君上疏。抗論官債。四年辛未。延岡藩內藤侯爲知事。請先師視學。先師曰。是或足以行吾志矣。携家而南。數月朝議郡縣天下。

盡罷諸侯任知事者。聚居東京。內藤侯亦將行。命其舊臣。乃留先師。先師既解荷蘭文。而未能讀英字也。於是課業餘暇。專致力於英文。搜索譯語。隨文求義。未必不通明。特以其無師授。初不能倣西人口吻而已。遂譯窮理解環一卷。又著譯文彙編數卷。在延岡三年。以疾辭去。澡浴阿蘇溫泉。輒癒。十一月。歸臥舊莊。杜門讀書。而挾策進者不絕。乃修門側一室處之。名曰雖覆舍。欲擬西崦精舍。以終身於藝園學圃間。奧子紹時奉職西海鎮臺。勸白川縣權令安岡某刻窮理解環於縣學。不果。乙亥丙子之交。有九州將亂

之兆。而往時從文簡先生游者。皆稍稍聚于東京。有起在仕途者。有教授自給者。因趣先師東。九年二月。先師再移東京。創設紹成書院。乃作之記。其畧云。今茲二月。辰乃從一二門生而至。居數月。就問業者益進。而舊游之士。亦屢詩酒徵遂于一堂之上。咸曰。文簡先生之講學。意在救天下之憂於未發。今則無及矣。然子能修先生之道。布諸一世。猶不愈於已乎。嗚呼。先生之道。原之六藝。貫穿百氏。馳騁今古。天文律曆。鑿術算數。莫不通習。兼修佛老之籍。浸淫手西人之言。而其要在以窮理之說。翼輔經藝。以濟乎當世

之務。蓋總之博。資之深。常游心物表。邈然與天爲徒。若夫顯微闡幽。推往知來。如嚮所舉者。皆不求而獲。不慮而言。蓋有原爾也。於是紹成書院之名。震天下。來遊門者。前後數千人。十二月。魯君亦來寓院中。明年。西南之亂果起。竹寒沙碧。莊亦罹兵燹。舊藏書籍。盡歸烏有。時先師手抄譯文彙編。撰定二卷。題曰初學文範。刊行于世。又印西客問答。時人併稱川田甕江。曰東都二甕。初幕府旗士從德川氏移于駿遠。至是落魄者甚多矣。先師偶聞久貝氏子孫復歸東京。求得其寓。嗣後歲時必往訪之。時有所救濟。曰。聊以

報舊德矣。中江篤介奇傑士也。睥睨天下。藐視王公。不肯與人相下。及一見先師。深服其識。執弟子禮。遂寓書院。先師命監督諸生。夜間暇則對坐酌醪。談古議今。不覺更漏之移也。先師常有志於大成東西史乘。嘗上書三條內府。建白其議。不報。乃著東瀛紀事本末二十卷。將以次及西洋各國。又以漢文譯常山紀談十卷。脫稿。篤介之力居多焉。後托竹添漸卿致之清國名儒俞樾。俞樾爲之序。激稱不措。先師既絕志於仕途久矣。然有時乎或爲內務省御用掛。或爲大學囑托。會有賜位碩學老儒之議。先師亦預焉。固

辭不受。天下推重。請爲斯文學會員。又爲東京學士會員。先師喜講論語。曰。吾嘗試舉世界古書。第一爲二典三謨。次爲摩西聖書。次爲周易。次爲釋氏藏經。其次卽魯論也。伊藤仁齋評曰。最上至極宇宙第一之書。西人斯微爾曼亦曰。彝倫之教。至於孔子極矣。摩西不及遠矣。文簡先生每援仁齋評言。以爲適當。予亦深重此書。有書賈請印其筆記。題曰紹成講義。當是時。學制屢變。西學勃興。漢學漸衰。諸生四散。六經四子。束之高閣。無有復顧者。孝悌彝倫之教。且墜地矣。華族女學女子高等師範東京中學諸校。囑托

先師。口授倫理。循循不倦。在家則訂史讀書。年益加老。樂道愈深。又著莊子考三卷。楚辭考二卷。二十三年庚寅。先師年七十一。四方及門之士相謀。期十一月開同窓會于東台櫻雲臺。明年二月。張壽筵于芝山紅葉館。先師作自壽序。讀至余以衰暮。日夕奔走。營營乎衣食。猶苦不給。未嘗有一日之安也。聽者悵然。無不嘆其數奇。大息曰。先生不容於世久矣。不容而後見君子耳。二十五年壬辰正月二十四日。北野氏病歿。齡五十六。八月。姪益夫君又歿于豐後。年三十九。先師嘆天壽在天。非人力所能也。且視人生之

朝不謀夕。益想斯文之當傳于千載也。手執二考。且改且刪。朱墨塗抹。一日不怠。校訂既成。曰。此二書。自信傳前脩之所不傳。到古人之所未到。方今我邦儒生解古文者鮮矣。予欲携之游于禹域。叩俞樾等門。不亦人生之一大快事也哉。又曰。往時文簡先生嘗語予云。一旦豁然心與理一者。其間僅一二日而已。今予半之。尚有所省養。則當倍徙焉。至此先師其德益高。其識愈明。接之猶坐春風中。然憂世之志。則未嘗已也。世人喧傳國家財政日告闕乏。乃算數內外貿易出入之計。裁書贈之谷子爵。今所謂勤儉尙武

之論也。疾起。荏苒不癒。病勢漸重。細川十洲先生來訪。贈梅花數枝。先師大悅。仰臥床上。口吟曰。詞朋贈我一瓶春。數朶瓊英映壁新。自咲衰殘瀕死日。得爲溪上看梅人。先生曰。瀕死二字宜改。先師笑曰。是寫實也。古人亦有此例矣。蓋先師交游除西崦舊友。其相得而莫逆。終始不渝者。獨有先生與藤野海南耳。海南先卒。十洲先生安政年間。介松岡敏初納交云。已隔二日。先師顧令嗣遺言曰。予死。毋以建碑刻銘爲也。墓面唯題故肥後藩遺臣岡松甕谷辰可也。言畢。溘然而逝。實明治二十八年二月十八日也。齡七

十又六。秋山範誠遠自土浦奔喪。衆使範誠撰墓誌文。且請十洲先生潤色之。越三日。葬于青山墓域。私諡曰文靖先生。先師有四男二女。長曰俊藏。次曰幸之助。皆夭。次卽令嗣參太郎君。爲法學博士。次匡四郎君。出嗣故文部大臣井上子家。長女名英子。適判事。中村勝君。次女名鳩子。適辯護士山田喜之助君。嗚呼。隆正年二十四。初列弟子末班。繆蒙先師眷愛。凡十七年。征清之役。從軍旅順。踰年聞訃。海岳萬里。歛不能拜其棺。窆不能臨其穴。五內分裂。作文遙祭其靈。後承乏臺中縣辨務署長數年。會參太郎君自

歐洲歸。任京都大學教授。兼臺灣總督府舊慣調查會法制部長。於是尺素往來。問安報平屢矣。三十四年十一月。釐革官制。隆正解職東歸。將復游于禹域也。乃過京都。往訪其寓。君爲隆正計。遂薦爲部僚。一日。君謂隆正曰。余久在海外。不敢省家事。先人遺稿散佚者不少。若得子幫助。以編次之。先人當瞑于地下。而不肖平生之志達矣。隆正曰。不敢請也。固所願耳。於是公務之暇。從事于此。閱年編次告成。隆正聞之。先師寢疾。自知不起。誠令嗣曰。乃父性固不喜夸耀于世矣。旣蓋其棺。勿畫我像。勿作我傳。雖然。使其

考其師之積學高行。隱晦埋沒。終于無徵。亦非爲子
爲弟子者之所安也。因敘述隆正所知事歷。以附遺
稿後。非我也。夫之責。固知其不免矣。他日太史氏立
儒林傳。或有所採擇于此。則隆正之願也。謹狀。

顯考默齋府君行狀

君諱隆吉。字良輔。幼字正太郎。後稱賴藻。號默齋。又
希岳。敗荻散人。關口氏。本姓源。其先出自六孫王經
基。經基十五世孫曰今川國氏。是爲今川氏祖。國氏
生基氏。基氏第五子經國。以外祖父小笠原清經讓
關口莊。初稱關口五郎。經國生顯氏。顯氏生兼氏。兼

氏生滿幸。滿幸生教兼。教兼生政興。政興生氏緣。稱
關口刑部大輔。氏緣無子。養瀨名氏貞二子。氏廣爲
子。稱關口刑部少輔。爲今川義元妹夫。義元國氏八
世孫。乃養氏廣女妻東照公。世所謂筑山夫人是也。
生一男二女。男名信康。卽清瀧公。旣而義元與織田
信長戰敗死。而東照公與織田氏和後。夫人母子遭
讒自殺。於是關口氏族離散四方。氏廣有子曰氏隆。
走武藏。冒母姓。稱飯泉左內。主麾下大草主膳家。當
是時。水府義公搜索戰國名族之後。左內亦移水戶。
慨然大悟。削髮爲僧。隱居城北駒籠村。號保養庵。歸

依者多。建伽藍。自爲開山。正保三年七月二日寂。釋
諡曰德源院心菴道鐵居士。是爲關口中興祖。左內
子重兵衛。重兵衛子五郎八。五郎八子某。襲父通稱。
有女無男。養竹山孫右衛門爲嗣。孫右衛門子祐右
衛門。祐右衛門子諱重矩。稱貞右衛門。復關口氏。養
柳田某。妻以其女。諱重利。亦無男。養粟津錠助爲嗣。
諱隆透。稱正左衛門。後號壽仙。重兵衛以下。世爲大
草氏臣。致仕後七年。臣事川井攝津守。後爲水野美
濃守所請。爲其家隸。配關口氏生女。名琴。能事父母。
婦德全備。年已二十八。未得伉儷也。會有水野九八

郎者。遠江國城東郡佐倉村右族。佐倉豐磨第十三
子也。遊江戶。爲牧野采女臣。壽仙君乃養爲女婿。命
名曰隆船。稱雄藏。號雄山。爲幕府御持弓與力。實府
君之顯考也。天保七年丙申九月十七日。生府君子
本所相生街。君幼敏悟。與衆兒戲。自擬大將。登高凭
几。號令指揮。悉得其法。隣里皆稱奇童。既受句讀於
木村金平。筆法於松島故山。甫十三。從齋藤篤信齋。
篤信齋以善劍鳴。夙唱尊王攘夷。誘掖諸生。當時豪
傑出入其門者甚衆。君侍杯酌。周旋不怠。一日藤田
東湖手贈新論壹部。曰。孺子能讀此書。異日必爲世

用耳。讚岐儒員赤井東海來說經。君益知所守。自奮自勵。講文習武。父師竊謂當以功名顯於天下也。十五加元服。雄山君致仕。府君襲其職。嘉永六年癸丑六月。米艦來浦賀。八月。露艦來長崎。天下漸報多事。君慷慨曰。不如講戰陣事矣。於是學御法於帶金彌四郎。弓術於安富小膳。游泳於山田豐太郎。武門故實於稻生虎太郎。而受兵法於吉原頭助。居三年。盡極其蘊奧。常誦方正學語曰。國家使數十年無才智士。國家不可一日無氣節士。又曰。人莫不有一死。或重於泰山。或輕於鴻毛。慷慨赴義易。從容就義難。以

是自警。是時大橋訥菴亦唱尊攘之說。君策名其門下。遂與其子陶菴其妻弟菊池澹如。深相結納。密議國事。先是戊午獄起。賴三樹吉田松陰等處刑。訥菴爲三樹建墓于千住廻向院。陶菴後又葬水府義士。君每奔走其間。最致資力。益爲訥菴父子所信用。訥菴嘗謀擁輪王寺宮以爲攘夷之舉。假編隊伍。君爲中軍參謀。至是久坂玄瑞金子與三郎兒島強介等。皆稱君節義而不措矣。文久二年壬戌正月。訥菴父子坐事下獄。未幾。早川顯藏等。要擊閣老安藤對馬守於坂下門。君亦遇嫌疑。禁錮數十日。君妹夫曰吉

田駒次郎爲町奉行與力。居八丁壕。專掌志士逮捕之事。君日夜招飲。從容探幕府吏情。又知獄中曲折。大爲訥菴父子謀。有椋木八太郎者。爲訥菴弟子。又嘗寓君家。坂下之變。與有力焉。於是君與路資。使之遁匿。而憂國情益切。唯恐遺累於父母兄弟也。三年癸亥四月。稱病辭職。讓家義弟。垂帷教授。從學者稍進。君居則講兵說道。出則輔友救急。水戶藤田小四郎遣使謂曰。僕今急要金若干。因以烈公所賜寶刀爲當。幸被聽。君輒諾。還其刀曰。莫用客氣也。後小四郎來謝。將去曰。騎虎之勢。有不可中止者。僕當大失

策耳。既有筑波山之舉。大高某林田藩臣也。慷慨有氣節。將之京師。君與數十金。某大悅。贈革甲一領曰。聊以報厚誼。從福原越後戰死堺町門。是爲元治元年甲子七月十九日。君上書河越侯云。方今外夷猖獗。內訌紛擾。實係王室之興廢。幕府之存亡。自古未曾有之大變也。苟失其政。則土崩瓦解。不可拯也。在位君子。豈可苟且偷安哉。伏惟無論開港通商與鎖港攘夷。不動干戈。而鎮定之也。難矣。當今之時。利害得失。措而不顧。唯大義之所在。名分之所存。英斷果決。一從天意人心。則王室可尊也。幕府可安也。不然

則內憂外患交至。天下於是乎危。國家於是乎亡。不堪痛哭悲痛之至。慶應元年。幕府興征長師而大敗。河越侯遣其臣高橋某來曰。聞毛利氏多用西洋銃砲。是以我兵每戰不利。敢問兵之要。君曰。兵之要在人和。而不在器利。人能用器。而不爲器所使。則百戰百勝。今之列侯從軍者。不奉號令。將士又皆不能用其器。却爲器所使也。由是敗耳。方東照公之在三河也。四隣受敵。其與武田氏戰。實用砲礮。然所以克者。不在兵器。而在人和。吾子盍少鑑焉。某請書之。君作書以獻。使相原安次郎移寓上野。上野多博徒。有事

則將驅使之。十月八日。矢野左金次來報曰。京師事起。將軍稱病辭職。阿部松前二閣老黜職。板倉河越二侯代之。復來曰。城中騷擾。或有率關東兵以抵抗王師之議。君大驚。往見陶菴。途遇河越臣富益某來曰。有大事矣。不知計所出。敢請指教。君怒曰。惡是何言。將軍辭職。外夷跋扈。實危急存亡之秋也。縱令朝旨不降。固宜赴難報國耳。貴藩業已奉詔。狼狽猶豫之爲。豈須余輩呶呶哉。醫士寬齋亦來。君立草時務策曰。侯而用之。寬永之隆盛可期焉。否則大事去矣。九日松岡萬大草瀧次郎依田雄太郎等。訪高橋伊

勢守。大論出處去就。會梅田國之輔來曰。諸君何因循之甚。事既至于此。唯爲幕府計耳。一死烏足道哉。今夜雨甚。宜乘暗之京師。君慰諭之。且囑以河越侯就職事。明日富益某與佐佐木某復來曰。我公有疾。不能應詔西上。將待數日而後發。方今外有開港之事。內有長防之戰。顧其處辨何如耳。國老山田某欲奉君命來請先生畫策。願先生有教之。君端然改容曰。某賦性愚魯。學問淺薄。然頗知天下大勢。國家安危。在此一舉。未輒可論。唯願群臣翼翼用心而可。大草松岡相謀。薦君爲河越侯幕賓。君有所思以病謝。

閉戶不敢接人。獨與門生增野文藏栗本州介等。日夜豪飲。文藏爲津和野侯臣。曰。我公實爲河越侯之兄。然則某之視河越侯。猶視我君公。某豈可默止哉。乃見河越侯說之。十五日。齋藤彌九郎來。彌九郎篤信齋之子也。曰。今日之事。係於幕府之安危。凡爲臣子者。捨生取義。斃而後止矣。僕雖無似。既繼箕裘。故欲鼓舞門人胥率入京。攘除洋夷。挽回國勢。而諸交游。無復一人應之者。吁止矣。自古關東稱用武之地。然而士大夫不重節義如此。不勝長大息也。吾子雅荷河越侯知遇。屢謁左右。且畫時務策。大有所輔翼。

果然也。僕將謀之。君笑曰。侯家姑息。不足與議。時事紛亂。某不復樂聞。請先生勿復言。齋藤大怒曰。咄。人心不可測。果如此耶。昨爲忠肝義膽之士。今爲柔懦怯懦之人。謾罵不絕口。君溫言以語其意。齋藤大悅曰。僕當叩侯門說中興大略。君止之。且曰。諸友將薦僕爲客卿。僕才短學淺。而其爲任也重且大矣。夫士之事君也。不慎出處。而妄進干祿。則不能行其道也。故彼遇以禮則可。否則不肯。齋藤盛稱其志。蓋自是月六日。至十日。君晝夜不能寢。至是初安眠。貼席云。明年秋。將軍家茂公薨。一橋慶喜公入繼宗統。襲將

軍職。一橋府輔臣穗積彥之進有僕曰清次。君欲探京師動靜。乃與陶庵謀。給資清次。往至千住。被捕。僞曰。斬洋人於鎌倉。遂處斬。三年正月。君著治計考曰。丈夫之在世也。不論其去就。要在於守士道。故勇退閑地。講究文武。則可以不愧於天地。況於無忘國家哉。古云。直己守道。濟時之大體也。遂沽却刀劍書藉。釐革家政。關宿人船橋隨菴亦志士也。精於古今田制沿革。君從受業。八月。鈴木恒太郎兄弟及依田雄太郎。斬原市之進于京師。乃自殺。先是君遣山田某追跡阻之。不及。蓋三士遊於君門下者。當是之時。天

下志士。各異其說。曰。尊王攘夷。曰。勤王佐幕。曰。鎖港。曰。開港。而幕府臣隸所見亦不同。君黨友主張勤王。佐幕鎖港。攘夷之說。勝安房守盛唱開港說。君與山岡鐵太郎約。將面詰有所爲也。君過九段阪。會安房守跨馬來。君以爲機不可失。拔刀擊之。誤當其鐙。鏘然有聲。而刀尖入馬腹。馬驚逸。不知所往。密語之山岡。山岡大驚曰。吾與君常疑勝之行爲。昨往叩其說。則知非徒唱通商以禍於幕府。常盡心於王霸之間。吾當爲君紹介。共謀國事。後安房守寄書。署君號曰。鐙齋先生。十月將軍納旌鉞。天子親政。十二月浮浪

之徒。潛匿于芝濱鹿兒島邸。橫行剽掠。酒井左衛門尉。將逮捕之。暴徒激怒。反襲酒井第。君時臥病。山岡松岡飛報曰。事起。請速來會。君蹶起。擐甲坐轎。往編隊伍。暴徒四散。乃歸。笑曰。吾幸不爲大高貳舞也。蓋此甲大高某所贈。於是德川氏始知君之誠忠而有材幹。二十五日有命。屬中條金之助。警戒市街。金之助亦抱尊王之志也。先是幕府設一學舍於一橋門外。曰開成所。專脩西洋學術。至是諸生大會。列藩諸士。將有所謀。君率同志而往。和歌山藩士竹內經介出接。君問曰。會者何人。竹內曰。舊幕府親藩譜第及

會桑以下三十六藩士也。曰：議何事？曰：討論進戰退守之得失。而後欲請當路者之裁決耳。豈有他議哉？君更請見舍長神田孝平。孝平延之別堂。渡邊一郎、柳川春三、林欽之助等在焉。君先說內府公納旌鉞之盛舉。曰：輕躁之徒弄兵，終使公負賊名。王師東下在近。凡爲德川臣子者，所以自處果何如？皆曰：是以相會討論戰守，取決於衆議耳。君曰：大義之所在，名分之所存，豈須衆議而後決焉哉？今日之事，一從內府公意耳。抑公之在一橋府也，常奉源烈公之懿旨，崇尊王室，有年于茲。厥忠厥孝，上天之所鑑，下民之

所仰。京師之變一起，嫌疑百出，不可疏陳。遂稱曰：叛賊。吾輩不忍騰之口舌也。嗟夫！源右大將創府而還，有若北條足利者，其罪千歲不滅。諸君不思之乎？抑又不恐之乎？衆曰：君言是也。然是會議，實出於小笠原閣老之意，不可私止。宜稟諸君議，然後從命。君獨赴赤阪，抵廐橋邸，請明日登城，必止進戰議。論難數刻，夜半始歸。十六日有命，停止開成所會議。於是論戰者漸衰，然猶有欲戰者。一夜轟然砲聲四聞，君率同志數十人，將赴小河街兵營，入小石川門，屢爲脫兵所狙擊。比至九段阪，彈藥散亂，營柵毀壞，始知步

夢野遺文卷三
兵在三番街者。爲脫營之計。而彈丸交至。衆皆滅提燈。步卒伏道。連擊行人。君等駢進。捕縛數人。訊問其故。曰指圖役古屋作左衛門謀。率兵脫營。走于中山道也。有一騎自阪下來。君誰何。曰步兵頭加藤平內也。君語以狀。使之招撫。又託後事於指圖役穴戶虎之助。轉路二番街。訪中條金之助而歸。又會津侯建議。募集江戶壯丁。號曰町兵。授佛國操練法。消防夫等應者數千人。奮曰。所以報三百年之恩者。在此一舉。君深憂之。上書論其可解散。不報。內府公謂政事堂議論不統一。曠日彌久。徒滋事端也。遂罷板倉小

笠原之職。更舉勝安房大久保越中爲參政。二月十二日。單騎入上野大樹院。表恭謹待詔之意。於是步兵撒兵。奧詰銃隊諸士。日夜會議。各計戰陣事。而爲公衛護者。曰遊擊隊。高橋伊勢守爲之長。曰精銳隊。中條金之助。山岡鐵太郎并爲頭取。十五日。君受命奉仕大樹院。或傳田安慶賴公請輪王寺宮。奏請免內府公賊名。不聽。君乃與中條金之助。山岡鐵太郎。松岡萬相。原安次郎。杉川秀太郎質之大久保越中。越中曰。果如世人所言。君曰。宮卽皇族也。一二請願。未可謂盡禮。臣等自今之後。連日伺候門牆。可以懇

請精神到。將必有所感動乎。越中曰。諸君盡力竭心幸矣。有小島銀之助者。君戚族也。曾在上海。二十餘年。與寺僧相識。乃爲導。先詣覺成院。語其來意。院主曰。大事也。決不可行。且夫內府公之爲將軍也。待我寺院之禮甚薄。而遇彼外國之儀特厚。是輕視我也。抑又公先世烈公唱廢佛論。下毀寺院之令。人其人。廬其居。是故無論我本山與否。凡爲天下僧侶者。孰不怨怒哉。況今法王不能釋然于內府公乎。君曰。水府下廢佛令。吾得聞之。然未聞德川氏有此令也。而况於公乎。至曰。待遇之禮薄。吾甚惑焉。我公襲職。實

在京師。鞅掌王事。未曾東歸。而天下由是多事。假令有一二違古例者。焉得誹議之。貴僧未見今日世態乎。內憂外患交起。上下攜離。有志者。不論其人何如。東奔西走。焦思苦慮。祈國家安寧。救人民塗炭。然則今可同太平之日而論哉。吾聞上野寺院之興。雖在寬永年間。然其源出自東照公。而三代將軍能繼其志。創建七堂伽藍。自是厥後。世世尊信。未有一君之輕視之。又未嘗聞失敬禮於法王也。今日公家危急之秋。藉口烈公敢棄三百年來之恩遇。恒人尙且不爲。獨僧徒安于此乎。某等舊幕府微臣耳。非有爵位

也。非受優遇也。然方今之時。臣子之分。孰忍傍觀默止哉。當以忠義報國耳。是所以特來煩貴僧也。且有爲貴僧可言者。某嘗上疏論待法王之典儀曰。我東照公之撥亂反正。專在武斷。而文化未全洽矣。故古典舊章。或有少背大義名分者。如以上野法王于日光門跡。則其一也。宜補此闕典。以申明祖宗尊王之大義耳。某等勤王佐幕之志。豈獨始於今日耶。請少諒察焉。院主低首久之。曰。高說無所不盡。然此事重大。當謀之闔山衆侶。而後致力也。乃招集僧徒十餘人。盡贊君說。僧心淨者。先導詣覺王院。覺王院時爲

執當職。不肯受謁。所謂手代僧者出。君曰。吾輩至此。伏願法王一舉玉趾。啓行京師。親奏內府。公恭謹之狀。以免賊名耳。曰。院主不能稟申法王。敢辭。君顧謂諸士曰。今日之事。不可半途而止。直詣宮門。言若不聽。有死無貳。將去。會有一士出自側門。顧見君等。却行曰。諸君來有何用。曰。吾輩欲有所請法王也。曰。某頗有所思。特擇一人。當與僕議於別室。君自進入室。曰。某等不欲妄進請願。以是順次來抵本院。然事既至此。不遑顧禮儀何如。將以死請。曰。諸君之志甚美。某雖不才。將更爲之計。言畢而入。既出曰。院主必使

諸君請有所貫徹。更冀徐爲之計。幸莫輕舉。君感謝。問其姓名。曰熊本藩使者志滿某。一僧來曰。諸君願望。院主既諾。然不可徒用口頭。宜作書具陳。君卽起稿。山岡書之。其略云。微臣某某等。今欲辨疏寡君所以蒙天譴。則恐有觸忌諱者。不敢贅陳焉。伏惟去年奉還政權。表章忠誠。未有背制詔之事。又無違朝旨之意。雖然。寡君初在三卿中。遽出繼宗統。恩德未洽。威信未伸。於是稍失駕馭之方。其在京畿也。會桑二藩。及旗下輕銳之徒。發大阪至京師。妄動干戈。遂致伏見山崎之變。寡君不敏之所致。恐懼曷已。卽命二

藩歸國待罪。若夫旗下將處置其首領。而寡君自艾自懲。以上野大樹院爲祖宗墳墓地也。退居于此。謹慎恭順。仰祈聖朝之照鑒。復無他意。唯恐寡君積年尊王之志。偶爲二三臣隸所註誤耳。然要亦寡君不敏之罪。於是暴白其志於天下。上下士民。無不知其意。而東西遠隔。聲息不通。側聞六軍發京。錦旗指東。是微臣等所以日夜痛歎。悱惻不能自己也。伏惟東叡山係德川氏之創造。各院諸房。因緣殊深。抑又輪王寺宮之於德川氏。豈止因緣哉。殿下旣爲法王。以大慈大悲爲心。以福田利益爲行。今命駕進京。奏請

先罷東征之師。不使萬民彷徨于脩羅場。又免寡君賊名。使德川宗廟不絕血食也。是微臣某等所切望。殿下苟納卑言。一有命駕。不獨微臣某等之幸。實一切衆生之大幸也。僧傳院主命曰。書辭甚是。然法王不可以諸君之請命。駕進京。若由田安諸公有所請。院主豈復度外之哉。君等大悅。歸報。大久保越中大勞之。於是田安公及列藩主交上書。有命曰。法王不日西上。宜選擇精銳隊士二人扈從焉。乃以川井玖太郎等應之。二十日駕發上野。榊原式部大輔等從之。小田原城主大久保加賀守年尙幼。藩臣擁戴幼

主。舉兵據箱根之險。以拒王師。目付平岡庄七徒目付前島來助爲正使。親傳公命。二十七日公又召山岡鐵太郎大草瀧次郎爲副。卽夜召君曰。寡人心尙未安。汝亦與山岡等往乎。君恐悚受命。二十八日駢騎抵品川驛。遇僧心淨。曰。應法王之召也。各坐竹輿。每輿四人舁之。過程谷驛。疾風暴雨。比至藤澤。天已明。午時見正使於小田原。曰。藩臣皆得聞命矣。山岡大草又往諭老臣。正副二使將歸。君曰。某未能知藩臣面從後背否。且法王駐駕。不敢西其轅。願某獨止。一則從法王發駕。一則覘藩臣向背而投逆旅。逆旅

主人勸君東歸。君曰。公命也。主人曰。嚮有官兵數人。曰。不問其士民。苟自江戶來者。卽報之。而君猶留不去。禍將不測。乃寄關一郎家。明日詣行殿。見覺王院。請速西上。前後三日。未嘗休矣。適有訛言。王師攻破矢倉澤箱根而來。一郎曰。危矣。乃匿星野某家。法王發小田原。藩臣亦不叛。君將復命。王師已據險設關。非有官符者。則不許往來。獨許商賈。君易衣爲行商。三月十二日到品川驛。遣使取刀劍衣服。卽夜驅輿。詣大樹院。具申其狀。公大喜慰勞。四月大總督有栖川親王將入江戶城。君登城。周旋兵馬間。臨去。夜方

二更。不勝感慨。朗吟曰。恨然按轡仰天泣。空有月光照大城。撒兵隊。福田八郎右衛門等。脫走上總。大與官軍戰。鎮撫使松平太郎往諭。不聽。君與山岡。見參謀津田山三郎。山三郎熊本藩士。舊相識也。偕赴鎮將府。見參謀海江田武治。辨論移晷。終賜官符。副以使者二人。乃遣梅田國之輔。大森達太郎及弟千三郎。旣而戰罷。是月十一日。內府公由上野移水戶。君與山岡。送至千住驛。臨別。顧謂君曰。汝宜鎮壓暴徒。使市民安焉。當是時。浮浪之徒。所在橫行暴掠。其屯于淺草本願寺者。稱乳虎隊。最極跋扈。君謂挫其強

硬者。其餘則自潰矣。乃往見隊長岡野誠一郎。隊士爛醉。杯盤狼藉。有箕坐者。有仰臥者。不敢通謁。君悠然步。杯盤間。觸者蹴之。面責誠一郎。命速解隊。又旗下士。動輒抗官兵。清水鎌太郎。中川長五郎。眞下音八。以侮辱官兵被縛。君上書請錮於我藩。五月十四日。晡時急使召君。馳詣田安公館。命鎮撫彰義隊。卽回馬上野。遇山岡于富阪。山岡曰。某百方說諭。不聽。往亦無益。君曰。如內命何。既至。服部綾雄。岡鐵三郎。河村正平等在焉。相共懇諭。自亥至丑。而隊本烏合。天將明。砲聲交發。君舍馬而步。由谷中過根津。至湯

島。彈丸雨注。丸木白三郎。駿府人。甫十六。從君。不知所終。明日巡視上野。爲官兵所蹂躪。君與山岡。遣精銳隊士。警衛廟墓。二十五日。詔封德川氏于駿河。遠江。參河。伊豆等。君上疏曰。宜速朝覲。謝恩命。一也。從士旅裝。最要輕便。二也。先移駿府。徐定會計。三也。不顧居處之陝隘。專講治國安民之策。四也。七月二日。爲留守居役。奧羽列藩相應援。謀奪內府公。勝大久保。諸老深憂之。君以爲不如使公不在水戶也。會罹病。不能起。乃招杉山秀太郎曰。請吾子代僕爲之。秀太郎辭曰。大事也。非我所能。君曰。事若不成。半途而

死。亦是爲國耳。力病馳馬至築地。請見鹿兒島藩士小松帶刀。帶刀辭。君曰。大事也。敢請。帶刀延之二層樓。君請屏左右。乃更登三層樓。君曰。某力病強起。所以請謁者。無他。寡君恭謹。退居水戶。而奧羽列藩。交遣使遊說。寡君斥而不見。然從士勇敢剛武。能知順逆者鮮矣。恐爲之內應。擁寡君爲盟主。復釀亂階。嚙臍無及。伏願使寡君移居駿河。是豈獨君臣之私情而已哉。抑亦忠於王室耳。帶刀首肯。且曰。僕爲作一書。宜轉交之大久保市藏。君挾其書。揚鞭赴太政官。市藏曰。君策甚善。傳總督命曰。宜作書奏請。君欣然。

援筆爲文。會山岡至。乃寫呈。卽蒙批准。偕駢轡往田安公館。諸老皆稱其殊功。於是內府公將移駿府。向者帶刀謂君曰。陸行不如航海之爲安也。因借戰艦壹艘。艤鹿島洋。九日公微行乘艦達駿河。君留在都。十一月爲公議人。尋遷公用人。二年正月。君及山岡督遷楓山廟于駿河事。三月靜寬院宮將西歸。君受命修理沿道。觀察天龍川水路之利害。又展祖宗墓于佐倉村。策開鑿御前崎。築一大港。復命駿府。三年三月。詔赦脫兵之罪。乃命君前往箱館處置之。先是君論曰。處此輩。不可以常法。不報。至是命下。君曰。今

在箱館者。不獨幕府臣隸。當時所謂陪臣者亦多。相率而來。封境無可容之地。故欲使某處辨之。請先與金貳萬兩。則某必臨機應變。不遣後患。遂與海老原某橋爪某中山某等。赴箱館。慰諭處辨。衆皆服。六月奉戴楓山東照公木主。遷于封內。辭公用人。爲金谷開墾方頭取格。乃與山岡中條大草等。巡視遠江地勢。君相城東郡月岡村。從事開拓。專用船橋隨庵之說。當是時。士族概承戰國之餘風。有殺伐之氣。動將有鬪角。君常以順厚自處。朝廷連召山岡等。授官。五年正月五月初任三瀨縣權參事。縣民帖然。士族請

演武技於某邸。參事水原某不許。君曰。凡人情謂之廢。則欲用之。故暫聽其請可也。十一月二日。轉置賜縣參事。叙從六位。未赴任。轉山形縣參事。六年十二月爲權令。明年二月。叙正六位。四月奉母歸鄉。八年六月兼五等判事。當是時。中國九州士族。大概心懷不平。動輒謀動干戈。君將任愛知縣令。參議伊藤博文請君爲山口縣令。君許諾。十二月二十七日。任山口縣令。九年一月。叙從五位。方前原一誠之辭職歸鄉也。招集同志。屢託事具函。請遊于萩。君不聽。會熊本亂起。十月二十七日。萩區長橫山俊彥報曰。聞東

肥之變。人心洶洶。請鎮壓之。既而士族八十餘人。群集明倫館。明倫館者。往時毛利氏藩學也。二十八日。暴徒謀攻山口。君遣縣吏命解散。而電報東京。事若起。則臨時處之。自率渡邊管吾兼常孝助桑野真澄等赴萩。且請廣島鎮臺派遣二中隊。橫山俊彥矯命奪官金。暴徒亦要陸軍中尉根津新。請借冲原製造所之洋銃。二十九日俊彥出奔。一誠遺書曰。二三年來。天下多事。僕鄙人也。而傍觀民疾苦。如秦人之視越人之肥瘠。亦所不忍。今將至闕下。精誠以諫。諫而不聽。死以繼之。若道路不通。則一蹴而過耳。蒙足下

愛撫久矣。臨去。具書以報。德山藩士數十人爲應援。將夾攻山口也。襲山田村。放火堂宇。又圍花岡警察出張所。而一誠等百餘人走須佐。大募士民。收得軍器兵械。載以漁舟三十餘艘。航至濱田。是夜君次佐佐並驛。首鳴橫山之罪。嚴令搜索。明日進至明木驛。遂入萩。諭示曰。宜正暴徒之罪。以追擊也。曰爲暴徒所誘者。悔悟自首。必免其罪。曰暴徒妻孥。苟無異心者。不敢咎。先是廣島鎮臺兵至明木陣而不進。駐萩陸軍士官遣使曰。急速來討。不應。君贈書諷訪大尉。切責之。於是諷訪大尉分四十人爲護衛。君又遣人

明倫館。投彈藥於池中。三十一日鎮兵守門。君呼酒酌之。賊四面轟擊。將襲殺之。潛匿前邸者。放銃突擊。鎮兵拒戰。君出後門。踰牆墀。往投一商家。所在火起。焰烟漲天。鎮兵退陣橋本。夾水而戰。彈丸雨注。君謂真澄曰。吾任在縣治。非將士也。不可戰死。要當歸廳具申政府。速爲之處耳。若途而死。則汝能代計之。乃召一奴。乞其服服之。被巾掩面。欲渡水而無舟。傍岸行。視一將校俯裏其傷。卽諏訪大尉也。曰。噫嘻。閣下尙生存乎。先導蒙犯煙焰。趨過賊陣前。大尉揮刀號令止砲。匍匐渡橋。君乘暗微行。夜半歸山口。十一月

一日鎮兵力戰。賊敗走。陸軍少將三浦梧樓來會山口。二日分爲二隊。一陣南明寺。一陣椿馬場。並進連擊。賊放火松雲院潰走。鎮兵追擊。斬獲甚多。三日君遣長屋又輔東上。具報戰狀。又與賊將奧平謙輔書曰。某到縣以來。未接警欵。再辱書札。不計今相見於兵馬間。苟亂天子之邦者。謂之亂賊。法憲所不貫。不敢從私情。將正其罪。然後止矣。一誠書云。我有銃槍三千。大砲八門。西鄉所贈。又購求鉛硝。敢死之士如雲。足使足下快一戰。足下又指日而知死期矣。足下讀書屬文。某太善之。若早負櫃于軍門。獻平生所作

詩文。某凱旋之日。盛宴滿酌。讀其文。誦其詩。酣醉談論。不亦快哉。足下盍早翻意。勿有致悔。君與三浦少將共發山口。又與一誠書。懇諭處決。是日一誠等就縛于島根縣。初一誠等起亂也。往須佐。三十一日來萩。見戰不利。復歸須佐。航海泊于雲州宇龍浦。船中乏水。命舟人登岸。橫山俊彥調之。爲巡查所捕。警部清水清太郎自抵其船。具說利害。一誠從之。至是就縛。而官軍賊徒。並未知之。六日少警視林三介率巡查百二十人至三田尻。孟春戰艦回泊萩灣。陸海並擊。一彈落於明倫館。轟然如雷。賊軍潰走。入須佐。官

軍分道尾擊。俘獲最多。君乃與判事岩村通俊尋至。發諭示。八日林少警視率巡查百人來。賊徒面縛降者夥。九日遣渡邊管吾具報近狀於東京。十日警部二宮久率巡查二十四人寄載輪船太平號。赴島根縣。縣官託言內務省令。不肯致一誠。君乃稟內務大丞品川彌二郎。連署請之內務卿大久保利通。曰。期十八日。特派司法卿大木喬任。遵命可也。十七日太平輪船自出雲至。島根縣警部大塚杉三曰。奉內務卿命。送致賊徒。君親出迎。一誠等。設檻准圓寺。每檻有格。各別居焉。山田穎太郎佐世一清。橫山俊彥各

被銃創。使醫治之。十八日三浦少將撤營旋山口。十九日大木司法卿駛艦過萩。將赴福岡縣。岩村判事承命。特置臨時裁判所。岩村爲所長。君謂賊徒罪當懲役者不下百人。故拘之一縣。禍將不測。請分之隣縣。十二月一日。君率僚屬設奠。自爲文以祭鎮兵戰死者。聽者感泣。三日。前原一誠等處斬。餘各有差。一誠等之下獄也。君每夜携酒。訪其獄舍。一誠唯謝其厚誼。不輒交言。謙輔論改正地租事。一夜謙輔昏醉喧嘩。君不復往見。岩村判事召喚謙輔。訊問已止。謙輔請曰。爲我謝令公曰。囚奴不復喧嘩。願賜酒如故。

岩村叱曰。惡是何言。天下豈有縣令而贈酒囚人者。謙輔慙然。岩村入告以狀曰。彼中情可憐。幸復餽之。卽夜君乃往。謙輔謝曰。公之賜酒。判事不知之乎。曰。固矣。抑余之侑酒慰藉者私情耳。判事焉得知之。謙輔曰。岩村年壯。言辯明晰。才能亦偉。顧天下才能如彼者蓋少。君笑曰。今世多賢良吏。謙輔曰。我輩常憂朝廷無人。相謀起兵。使公言信。則我輩所爲終無益。曰。不啻無益。反害天下耳。謙輔默然。君問獄中有作否。曰。無。昔年有感賦七律三十首。見在落合氏許。僕死在近。無復答恩遇者。願取彼詩冊。賜覽。死猶生。又

請遺其母。君面給筆硯。謙輔以國字書之。紙尾書曰。縣令關口善視兒。一誠將被刑。君親蒞其場。酌酒訣別。一誠臨刑。顏色如平生。巡查某竊袖一誠遺書數通來曰。某受前原先生之愛者。昨夜巡邏檻外。先生托以此書。誼不可辭。乃諾。雖然。事露。恐辱我職。敢告。君顰蹙曰。汝以爲誼不可辭。則盍直付其家。不然則不如不諾之爲愈也。然莫以爲憂也。一誠就戮之明日。召其親屬於廳庭。令各讀其書。且讀且泣。已畢。君手收焚之。十年二月。鹿兒島亂起。天下震動。於是前原殘黨町田梅之進等。將復據萩爲之應援。五月三

十日。警察出張所警部能一報曰。暴徒謀先放火警察出張所。進襲山口縣廳。又萩區長桂路祐報曰。昨夜士族二十人。乘暗提刀携銃。逐群成隊。經松本磧至川上臺。時君觀圍碁。徐起。出自後門。迂回登廳。發電報於馬關。召集巡查二十人。特許巡查携帶劍銃。分爲二隊。一護縣廳。一備賊襲。兵備漸定。天方明矣。會巡查飯尾仙太郎來曰。昨拘町田梅之進等四人。將訊問。賊數十人來襲。放火發銃。警部巡查防戰不利。賊拉四人去。某走御許街。顧則烟焰燒天。叛狀已顯。乃請駐紮馬關陸軍士官。派遣鎮兵。君令曰。縣官

而歷常野奧羽之戰者。擢爲隊長。不必論官位等級也。警部高橋英一大森勝英爲斥候隊長。將巡查十五人。少檢事林某將四十人。屬官富田國輔秋良定臣警部宮原貞亮山田春三等。各率十五人。踰一之阪。捕一賈人。曰。賊徒二百餘人。謀今夜襲山口。或午睡焉。或晏臥焉。高橋等鼓勇奮進。乘其不意。短兵急擊。賊徒狼狽敗走。遣使報捷。且請速來援。林少檢事陣夏木原。又報曰。前軍已勝矣。六月一日。林少檢事合兵。侵曉伐賊于佐佐。賊捨壘走。秋良定臣等進扼古戰場村之險。日將午。賊大舉挑戰。秋良山田疾呼

勵衆。直犯其衝。賊將町田身先士卒。揮刀大聲自名。秋良放六連發銃。中其右頰。町田死。三浦某取其首級。致之山口。君乃梟之。殘賊四散。二日君赴于萩。撫士民。或曰。是役山口砲兵所有彈藥五十餘萬。又陸軍營所有銃器數百。而分營無鎮兵之備。縣廳僅有巡查數十人耳。使賊得志。則禍害不可測。不出三日。賊徒盡平。實君之力也。七月詔賜金幣。九月鹿兒島亂亦平。十二月叙勳四等。賜金五百圓。十二年二月。被譴責。以擅脩文庫庖厨故也。明年二月。有內旨。將榮遷內務省。君固辭。明年春。任元老院議官。叙從四

位。移居東京。迎母夫人。八月賜縮緬二匹。賞君奉職于山形縣。致力改正地租也。十二月十八日。母夫人歿。哀毀過禮。十五年十二月。叙勳三等。賜旭日中綬章。君常曰。留心典籍。坊間有逸書斷編。苟關德川氏及救荒者。必購之。曰。世人動輒譏幕府之政令。然異日朝廷編輯歷史法律。亦奚知無不由于此哉。余生也。在天保凶歲。既長。親聞父老談其慘狀。未能一日忘懷也。壯年頗修田園之學。益知儲積救荒之不可忽。頃者朝廷賜以散官。豈空過歲月哉。是此一業。亦所以答聖恩之萬一也。聚書積至數百卷。君以園基

爲樂。與柴原岩村諸人親善。然客去。手不釋卷。十六年四月。爲地方巡察使。元老院書記官周布公平書記生辻棐隨行。巡視東京府及千葉茨城栃木神奈川靜岡愛知三重岐阜八縣。凡自縣治之成績。田園之肥瘠。人情風俗之淑慝。山川形勢之險夷。以至教育衛生租稅勸業郵便電信銀行會社政黨。無不精察焉。九月復命。并上意見書。十七年二月。爲高等法院陪席裁判官。五月遣隆正于支那留學焉。曰。我所以命汝遊支那。以及歐米者。特有深意存焉。天下大定。吾亦老矣。然自今後可憂者。卽支那耳。苟不相和。

則國勢危矣。汝能記之。九月任靜岡縣令。與書隆正曰。朝廷詔爲本貫。縣令實出於異數。且遠州我祖考桑梓之地。吾榮何加。或譏君曰。政加姑息。廳庭卑隘也。君笑曰。吾不貴官衙之美。獨貴縣治之優耳。初開隧道于社山。稱曰縣下一大工事。又設石閘於富士郡。土民嗷嗷。君百方開諭。逐漸竣功。明年秋。編成救荒叢書。自叙曰。凶年飢歲。自有定運。故古聖王夙知其不可免。豫爲之備。不使蒸民陷於飢餓也。留心經世者。無罪其歲。而憂其無備。則國家之福也。十九年一月。召歸隆正。既而進京。當是時。君巡行縣下。每過

德川氏廟墓寺院。見其壞頽。自捐貲脩之。且索逸書古文。建久能文庫。曰。金澤足利宮崎駿河望岳楓山諸文庫。僅存其一二。今視其書目。概係宋明古版。涉我史書者鮮。故久能文庫。首蒐集古典舊藉之係於歷史地誌律令者。如經書。則爲其次。七月任靜岡縣知事。十一月叙正四位。二十一年二月。在京。新築縣廳之議。不相協。或曰。議破則知事不復歸也。聞者大驚。縣會議決。五月巡視遠江三河。獻海防費金千圓。十五日詔列久能山東照宮於別格官幣社。靜岡淺間神社於國幣社。君爲勅使祭告之。君又曰。古所謂

朱印判物。于今視之。虛券故紙耳。然藏之祠寺。亦足照體守而知舊慣。視諸鎌倉室町今川武田之古文書。豈有彼藏此棄之理哉。乃請內務省還付朱印。省議曰。明治六年。皇城炎上。八年內務省文庫又災。朱印等歸烏有者最多。檢靜岡縣所屬。僅存五十九社寺朱印。他六百二十二所。存佚未詳。若還付存者。恐生物議。君抗言曰。明治之初。內國事務局之徵收朱印也。欲查明領地之真偽耳。非沒官也。今以罹災故。存者亦不還付可乎。六月十八日。還付朱印六百通。君納之久能山。七月山岡子爵薨于東京。先一日。君

往訪病。子爵曰。待君久矣。乃屏左右。手示一書。托以後事。先是德川一位公移邸于西草深街。賜舊邸在紺屋街者。至是固辭。更賜寶刀一口。十月德川公爵歸。賜田園於舊臣隸子弟。事無細大。君自監理。世或譏之。君曰。君臣之舊誼。自有不能已者。何患人言。公爵贈手書謝之。又賜金千圓。二十二年二月。朝廷初定憲法。遣勅使于神祇諸陵。君亦爲勅使。時有謀構讒陷君者。君固守公正。不復顧。三月歸自東京。四月愛知縣施行招魂祭。請君來會。乃坐乘土工汽車。既過安倍河。衝突於東行汽車。將顛覆。君端坐不動。遂

負傷。時十一日午時也。歸家。意氣如平日。謂隆正曰。或有召良醫于東京之議。然吾不願也。吾承任靜岡。靜岡非無良醫。故受其治療耳。四方傳聞。自親王大。臣至士庶人。電報郵便訪病者雲聚。十五日病漸重。然猶手執筆硯。作與德川氏書。十七日醫學博士佐藤進自東京來。德川源公親臨慰藉。君欣然拜謝。謂侍臣曰。近日復詣門下。開棋一局。夜闌。隆正等四人侍坐。囑以後事。細大無遺。曰。吾死。葬之臨濟寺。嘗作墓石圖。莫刻虛文。若朝廷有特旨。必勒之墓側。鷄鳴。召親族十餘人曰。陳新代謝。豈獨花卉草木哉。人生

亦然。今吾含一塊冰。須臾消滅無痕。諸子勿悲。余消滅。天明病少怠。又盡屏左右。見靜岡縣書記官伊志田友方。村田豐警部長。相原安次郎等。具語縣治方略。顧村田書記官曰。願君速進京。爲語松方內務大臣及伊藤勝二伯。苟納卑言。後任得人。則余死無遺憾矣。村田卽時上途。詔賜菓子壹匣。特叙從三位。君仰臥捧讀。而不能稽顙。命隆正曰。汝沐浴席地。東嚮。代拜聖恩。二十一日。村田書記官歸示內務大臣手書。具語內閣諸公言。無不聽之狀。君大悅曰。又無介子懷者。唯恐不能上酬聖天子之優遇。下副內閣諸

公之高誼也。請諸君同心協力。執掌王事。內務大臣遣軍醫總監高木兼寬來診。宮內大臣土方久元贈書伊志田書記書曰。連接電報。隨時以聞。猶期無不怠。君流涕曰。不勝恐悚。五月二日有栖川親王遣使慰問。且賜洋酒。德川公爵請侍醫局長池田謙齋來診。池田侍醫曰。宜養氣以攘二豎子。君微笑曰。幸爲僕謝德川。十七日君延靜岡病院長井上豐作。謝勞劬。又執村田書記官手曰。政務多端。君當其衝。真不堪謝。頃之獨語曰。噫嘻。不能復答陛下之恩遇乎。遂瞑。齡五十又四。越五日。葬于靜岡臨濟寺。遠近會葬。

者。凡五千人。勅使臨第。賜白絹貳匹。并金千圓。君爲人沈毅寡言。少負氣節。最有智畧。寬厚剛直。臨事。不避禍福。強記博洽。讀書過眼。終生不忘。精於本朝典故。兼及外國。又能鑑識刀劍利鈍。鼎彝真贋。平生自奉薄。而其施人也厚。親戚故舊出入其門者。無不蒙恩眷。居官清廉。任才使能。不問親疎。不咎舊惡。故人樂爲之用。惟孝惟忠。實出於天性。君每過東海道。必候德川源公邸。又訪吉原守拙于三島。關重磨于小田原。以師友故也。麾下水野氏。祖考之舊主也。家道大衰。君招其子孫教養之。後又延其祖母。待遇甚渥。

坂下之變。年僅二十又六。大橋訥菴請君甄別刀劍。君更遺一刀。君爲山口縣令時。出在東京。一夜縉紳先生張宴於一樓。君亦與焉。有一權臣乘醉忽唾君面。且撲之曰。舊幕臣多是柔懦之士。君亦反唾其面。搏倒之曰。中國田舍兒。何其無力也。一坐大驚。居間和解。明日權臣親來謝罪。君常吟誦曰。赤眉銅馬與黃巾。漢魏收功豈異人。駕馭撫綏要有術。從來盜賊本王臣。故有朋黨構讒者。毫不介意。有報怨以直之概。高久進三者。舊幕府臣也。善擊劍。萩之役。屬前原一誠。將搃君來見曰。僕爲行商。君笑曰。子欲賣彈藥。

於中國耶。進三縮首而去。後在獄五年。赦歸靜岡。君以爲警察吏。西南之役。有一官吏。袖德川源公所書和歌來乞借金百圓。君曰。廉甚。乃許之。君之遭難也。嘗托一封書曰。吾死後。菊地長四郎等來則披之。長四郎澹如之子。歿後如其言。內有和歌二首及數語。曰。元旦爲除夜之翌。除夜卽爲元旦。元旦卽爲除夜。生者死。死者生。要皆人世之常也。具記教育子弟之法。又論薄葬事。君罹病。隆正侍坐。談及高鳥易斷。踰年。隆正至于熱海。會高鳥吞象來遊。乃訪質之。曰。吾與尊公交久矣。屢爲筮之。昨春相遇于此。又筮遇震

之乾。是爲无妄。時相原警部長在坐。相顧不出一語。隆正熟讀其卦。掩卷泣曰。嗚呼命哉。配稻生氏。先卒。無子。繼配山田氏。亦卒。生一男四女。男名壯吉。嫡女名操。卽隆正妻也。一女夭。隆正讓家壯吉。側室大塚氏。生三男四女。長曰出。冒新村氏。次曰周藏。冒加藤氏。次曰鯉吉。今尙幼。長女名八千。適三竹氏。餘皆在家。

撮影題記一

余年既三十。不能立。四十又將至。無聞則欲有白眉之稱。豈可得哉。雖然。其所以至於此者。未始過於欲

使諸弟倣蜀龍吳虎也。今茲四月。新村仲出全修尋常中學諸科。越一月。又入高等中學。而家嗣壯吉。晉京應試。亦在明春。私心竊喜其爲人之杞梓而已。於是更誘加藤叔周。相共提挈。同撮小照。旣成。顧諗之曰。凡今之人。莫如兄弟。兄弟鬩牆。尙且禦侮。況鞞鞞相映者。何成而不成耶。故自今之後。進修德業。名滿天下。諸弟之任也。過使我家不有參商者。乃兄之責也。若夫爭財趨利。艱難不救。則先君子之遺訓存焉。嗚呼。吾子往矣。勉哉。暇則往來親炙於碩學高士之間。問道請教。尙或有知余志者乎。就而質之可矣。特

期無味於諂言。以傷彝倫之美也。季弟鯉吉從太孺人居。不在于靜岡。故以兒秦三代之云。壬辰五月。愚兒隆正手記。

撮影題記二

嗚呼。天下之事。盡兒戲也耳。朝習象胥之學。而喃喃相語。夕屬彫蟲之文。而揚揚相尙。甚則西航東去。不過數州。以說人情風俗。途聽巷議。牽強附會。以論制度文物。遽而傲然自誇曰。我能知東洋之大勢。又能視亞州之形狀。譬如兒輩遊嬉。仰天提空。馳地捕風。其所得者。蓋鮮矣。雖然。英俊豪傑之士。起於其間。他

年業成。歸朝供職。翱翔廟堂之上。折衝樽俎之間。誠使我邦致和中外。而不損國權者。當亦不乏其人也。友人井上子德遊清數年。改服辮髮。以便往來。頃者寓上海。又將別諸友。皆曰。蓬聚萍散。固不可期。同撮其影。以供別後之觀。可乎。衆曰。善。既而坐有言者曰。我輩相識相親。不在本朝。而在於清國。宜服其衣帽。與子德同形。或笑曰。是其兒戲耳。非大丈夫之所爲也。或曰。否。不然。天下無往而不兒戲。何獨捨彼而咎此哉。衆皆以爲真然。乃卜十月四日。同往照相館。圖中凡七人。左則坐而置手膝上者。井上子德也。與子

夢野遺文卷三
德比肩而坐。手執紈扇者爲田口茂卿。皆東京人。其
鵠立而拱手者爲高柳仲豐。係佐賀人。又手持摺扇。
其人若有所思者爲今西友吉。西京人。右首側坐。左
手持紈扇者爲森師教。岡山人。至于踞地而坐。擁書
置膝。及手握烟袋。退立人後。儼然若有所失。悠然如
無意者。少長二人。蓋喜天下之兒戲。而未得其樂也。
今逸其姓字。視者庶或知乎。明治十八年冬十一月。
書于上海北京路客寓。

題扇面合裝幅

此幅首貼扇面。顯祖赤城清水先生自警文一則。明

治庚辰曝書之次。家兄伯武持爲余書者。其冬病沒。
蓋絕筆也。明年余出冒關口氏。下貼扇面。在於元治
慶應年間合作。坦庵名正幹。渥美氏。曲亭馬琴外孫。
藤森天山門人。雲溟今逸姓字。可默生吉田氏。宇都
宮人。六石頑士名信緝。縣氏。叔父訥庵大橋先生高
足弟子。明治初。爲判官。敗荻迂人。卽我養親考默齋
府君別號。是時也。府君納交四方志士。詩酒徵逐。專
唱尊王攘夷之說。故用此號云。余嘗質之。府君笑曰。
我家舊藏竹田所畫敗荻圖幅。乃寓大敗夷狄之意。
今而思之。亦是一場夢耶。嗚呼。後之展此幅者。仰誦

夢界遺文卷三
自警文。俯觀彼書畫。則當知我養實兩家文瀾武派。自有淵源焉耳。抑我家子弟求用于世乎。求無愧于世乎。今不敢問也。只希其學不安乎小成矣。

書後藤棲霞方伯詩帖後

棲霞方伯過安東縣。余卽往謁。談及滿韓之事。余頗述我所見。方伯笑曰。吾子之言。今不能行也。予自大連到瀋陽。轉途於此。更過韓國。將歸臺灣。行程數千百里。閱日僅僅二旬。瞥見山河。耳食風俗。譬猶聞炙鰻之臭。未知肉味也。然非併滿韓而安排之。豈可謂講東亞百年之長計哉。余曰。天下之人。臭且不聞。欲

染指于此者。抑亦誤矣。時出斯帖。請錄近製。曰。今夜援筆。明朝繳之。此篇卽是也。乙巳九月念三。

櫻溪文鈔跋

吾友伯實歿後一年。子漸選遺文公諸世。徵余題跋。余曰。嗚呼。斯選當與息軒遺稿。永傳于後世矣。蓋伯實弱冠善文。余則成童喜武。伯實謹直刺刺。余則疎暴嚶嚶。始相識於我。立志塾也。締交莫逆。隨時善導。余問作文法。伯實慇懇遊於息軒先生之門。余乃執贄往謁。曰。吾子欲學斯文。宜先研鑽六經也。因侍講筵。且借文集。手抄卒業。質疑義於伯實。伯實懇說切

諭循循不倦。既先生逝。更謁甕谷夫子。曰修辭之法。叙事寫實。爲第一義。論說諸體。則其次也。余專致力於此。稍有所得焉。伯實大悅。後賦禹域游。習修時文。曰他日供國家之用足矣。歸朝。伯實勸余列名廻瀾社。余辭曰。賦性駑駘。從群驥後。聯鑣文場。揚鞭藝園。非我志也。且有庭訓矣。伯實首肯。自時厥後。遭家多難。北馬南船。不遑寧處。然獲一篇。輒送稿歸正。又晉京必訪之。談論移晷。同卓共食。未嘗異於少壯時也。獨有煎茶燒糕。與煖酒炙鰻之別耳。故伯實於余。猶弟兄也。豈得容黃嘴於其文哉。至朱批藍評。則子漸

在焉。雖然。今讀斯選。偶有讀息軒遺稿之感。伯實亦首肯于地下否乎。時大正壬戌仲春於京都學林坊寓樓。

男 關口泰 同校
友人 館森鴻

夢界遺文卷三 大尾

後序

關口士璠夢界遺文刻成。友人館森子漸來曰。士璠
歿已四年。遺集未刻。吾蒐羅獲四十二篇。今海內與
士璠有文字之交者。唯吾子一人耳。請爲一言。嗚呼。
予寧忍跋士璠之文乎。明治四年。士璠始執贄于先
王父之門。時歲十七八。結長髮。挾大刀。矯矯然有劍
客之風。時則拔劍長歌。劇談雄辯。常屈座人。及聞忠
臣孝子烈士義僕之事。往往飲泣弗能言。蓋古所謂
感慨悲歌之流。予竊悲其不獲厥時。在門一二年而
去。後予以事去東京。十三年春再游。訪岡松甕谷于

外櫻田之寓。甕谷曰。關口生識子。今在吾塾。請見之。至則兀然端坐。言辭極殷勤。頗有謹厚長者之風。蓋士璠之志。至是一變矣。子漸曰。士璠冒關口氏家道稍裕。肆力於文章者有年。十七年游上海。歸爲靜岡中學校教諭。日清役起。以陸軍通譯在遼東。役竣。轉臺中辨務署長。三十七年。復任陸軍通譯赴滿洲。在臺灣滿洲者。前後三十年。竟弗獲志而歿。嗚呼。士璠果弗獲厥時矣。獨其文章。炳炳琅琅。長在天壤間。足以慰士璠於冥冥矣。雖然。此固非士璠之志也。知非其志。而猶有遺文之刻者。子漸之心。亦可悲哉。今讀

其文。猶想見當時言談風發。意氣如虹也。士璠初名清水璣四郎。赤城先生孫也。

昭和四年三月下旬

東京

安井朝康撰

Blank page with vertical lines, likely a separator or endpaper.

昭和四年六月廿七日印刷
昭和四年六月三十日發行

著者 故關 口 隆 正

發行者兼 校正者 關 口 泰

印刷者 東京府下大井町金子六二一六番地 圓 谷 三 之 助

東京市日本橋區龜島町一ノ四二番地

印刷所 圓谷印刷所

東京市日本橋區龜島町一ノ四二番地

324
2

終

